

萬 有 文 庫

第二集七百七種

王 雲 五 主 編

鮑 埼 亭 集

(二)

全 祖 望 撰

商 務 印 書 館 發 行

萬有文庫

第二集七百種

商務印書館發行

鮚埼亭集卷第八

碑銘

明兵科都給事中董公神道表

鄞 全祖望紹衣撰

餘姚史夢蛟竹房校

公諱志寧字幼安。浙之寧波府鄞縣人也。遠祖之邵居奉化。宋建炎中與李脩任職起義兵以拒金。得千餘人。三戰於泉口。金人不能入而退。故明州殘破而奉化獨全。事定口不言功。其後蔡文懿公幼學言之於朝。贈三人官皆修武郎。而三家子孫並大其門。之邵之孫仁聲仁澤仁霖先後成進士。仁聲官至殿學三傳而爲恭禮。明洪武辛未進士以養母隱居黃楊壩中。公之八世祖也。曾祖鏌祖宰父僕萬歷丁酉舉人之副。公由諸生食餼貢太學。少以名節自勵。乙酉六月大兵長驅入浙。公徧謁同里薦紳勸以起兵。聞者皆笑以爲狂。獨刑部員外郎錢公是之。顧其事莫能集。閏六月初八日餘姚兵起。明日會稽亦應之。又明日鄞人始會議。然猶相顧莫敢主者。最後錢公力疾至請獨任之。而故大僕卿謝三賓家富耦國新從江上迎降歸。惡聞其事。定海總兵王之仁亦以迎降得仍舊任者也。三賓私遺之書曰。諭諭訛訛思拚頭顱以披猖於一擲者。皆出自庸妄者之口。將軍以所部來斬六狂生事卽解矣。僕請以千金爲壽。六狂生者陸公宇燭張公夢錫華公夏王公家勤毛公聚奎而公其首也。會之仁中悔致書錢公請自効。翌日帥所部至大會鄞人於演武場。三賓不知也。揚揚來赴以爲殺六狂生命在漏刻。坐定之仁於袖中出其書。

朗誦責之三賓戟手前奪其書之仁怒。麾軍士令斬其首以祭。三賓叩頭乞哀。請出家財充餉。乃止。一軍股栗。監國次於會稽。授公大理寺評事。視師瓜里。而三賓亦至會稽。以賂結戚。晚張氏由散寮驟躋東閣。且假勸輸義餉之名。乾沒里中軍需。公惡之。棄官歸。甫一年。江師。三賓復降。踰年而有五君子之禍。是時浙地盡歸版圖。祇舟山石浦未下。大兵亦置之不以爲意。而航海之軍至長垣。連陷閩海州縣。且逼福州。於是大兵之備浙者。頗抽以備閩。殘明遺老。始稍稍於浙東山中結寨拒命。而李公長祥。王公翊兩軍爲主盟。公與華王諸公計。以王公軍下寧波。而已翻城應之。因連李公軍以下紹興。監國故疆可復也。華王諸公皆喜。馮公京第聞之。請以舟山之軍來會。刻日部署已定。復爲三賓所諜知。發其事。四出搜捕。五君子皆遇害。公獨逃之。舟山得脫。嗚呼。大朝爲天命所眷。江南半壁且不支。何有於浙東。浙東一道且不支。何有於寧波。諸公之耿耿未下者。雖云故國故君之感。其如天意何。然而稽古在昔。終不能不比之。厓山一輩人物。況又出自祭酒布衣。此其所以益難也。監國既至舟山。遷公兵科都給事中。時時奉使入內地。聯絡山寨諸軍。以爲海上策應。山寨亦感其孤忠。資糧屏屨不戒而集。辛卯。舟山失守。公自刎死。其時以鄞人同殉者。楊吏部思任。戴工部仲謀也。監國始於紹興。終於舟山。其後飄泊海中。無能爲矣。公以倡義首事。卒以一死謝之。可謂與魯存亡者也。遺骸在海上。陸公宇燦捐金募人致之。以禮葬於城北馬公橋下。先一日。夢公曰。吾別一足。奈何。啟視。果失右趾。大驚。束蒲補之。說者以爲文山之見夢於髮繩也。公初娶徐氏。繼娶羅氏。子二。士駿。士驤。方公初入舟山時。天朝捕其妻子。有義僕文周匿之。赴官受拷。垂死。不言得免。華公在囚中。作泗水鼎樂府。紀同難事。首褒之。其後羅孺人聞公赴仰藥而卒。而士駿兄弟

育於高公宇泰家。及長，卒承先志，蹈海不返。文周悼公祀之絕也，遂以縞素蔬茹終身。一門節烈之盛，實古今所希有云。惟先曾王父兄弟，於公最厚，嘗言公狀貌挺露，術者謂公必居風憲，不知其爲忠臣相也。而王太常水功曰：幼安正命翁洲，遂與張太傅、吳少保諸元老鴈行，是亦何貴如之矣。雍正庚戌，公之從孫清越乞余表墓，乃再拜而詮次之。蓋去公之卒八十年，其銘曰：

以六狂生之特而不死兮，天佑之以倡江上之諸軍。以五君子之徒而不死兮，天脫之以備海上之孤臣。卒正命於九死之餘兮，天許之以成炎興之完人。嗚呼！給事是爲建炎義士之孫。

明錦衣徐公墓柱銘

公姓徐氏，諱啟睿，字聖思，浙江寧波府鄞縣人也。曾祖某，祖某，父某，娶某氏。公少負才任氣，喜爲俠烈之行，眉如稜，目如顰，尤嗜擊劍，臥起常佩之。旁通琴書，篆刻陸博諸技，而篆刻最精，然不肯以藝名。旣補諸生，累試於布政司，不售。時對酒當歌，輒歎曰：天生徐公，胡乃老之草間，而使敵寇交訐也。則拔劍起舞，謾罵座上貴人，以劍擬之。貴人皆膝席，莫敢忤視。或跳而去，於是遂相戒遠之。然每規人之過，輒苦口泣下。其方正又如此。旣久鬱鬱，一日忽埋故佩劍，椎酒牀，裂琴衣，削髮師事徑山浮屠雪嶠。則又閑靜寡言，粥如真道者。釋名洪節，字近公。閉關延慶寺中，錮其門，飲食俱自竇入。其孺人亦受佛法，甲申之難，哭七日夜不絕聲。旣而曰：江南半壁，我高皇帝龍興地，建武之業，猶可望也。則又閉關如初。踰年，南都再陷，則破關出，掘故所埋劍，夾以雙斧冠鶚冠，衣綠錦衣，大聲如雷，趨錢督師營，道出周太守元懋家。適元懋忌日，公橫刀長揖曰：介冑之士，不復爲尊先人作拜。願須飲我酒。酒至，則連舉三斗，逕去。督師故與公同社。

亟引見於監國。因問所需何官。方得稱手。對曰。臣請以布衣居肅樂幕。入參帷幄。出捍軍旅。不必官也。監國奇之。授以錦衣衛指揮。不拜。自稱白衣參軍。時江上諸營首鼠。互相觀望。則又罵曰。今日焚舟前進。或可一逞。逍遙坐老。以自困乎。每江上耀兵。則出立矢石間。以先衆。諸營目笑焉。一日晨起。則佩劍集其麾下百夫。屠牛饗之。諭以大義。百夫亦唯唯而泣。徑自東岸渡江。直薄西岸。大兵以爲游騎。不以爲意。亦遣裨將禦之。則奮劍直前。掩殺過半。城上乃亟出銳師爲繼。且戒曰。觀其帥甚奇。必生致之。於是大兵蜂湧而至。長圍四合。且戰且擁。而公忽陷泥淖中。遂被執。諭之降。則謾罵。大兵怒。刳其腹。實以草。懸之江門。監國聞之。震悼。令以原官加贈都督。其子世襲指揮。而招魂以葬之。百夫見公之死。亦無降者。公之出也。督師力止之。曰。軍行必無後繼。徒入虎口。無益也。對曰。信陵君欲以賓客赴秦軍。豈能若秦何。亦各申其志也。吾將觸鬪而死。以愧諸營之賦清人者。至是。督師以詩哭之。曰。嗚呼。果見其出而不見其入也。初。公聞遼瀋日蹙。兩河內潰。歎息以爲國必亡。則自雕一私印。曰復明。至是竟死。而雪嶠之開堂于徑山也。從之者三千人。顧未有付法者。最後得江西黃公端伯。曰。可矣。卽付之。是後又寂然。及公至。請曰。某亦或端伯之亞也。雪嶠相對而笑。亦付之。時稱爲雙瓣香。說者歎雪嶠之爲冰鑑也。嗚呼。公之志則烈矣。然吾見督師集中。有和聖思軍中思親詩。則其時公尙有親也。君父良難兼顧。但公以環堵書生。未嘗受國家恩命。而必棄其親以從君。斯亦不無小過。是時如彤菴。簞谿。蒼水。嘿農。楚石。及管江諸杜。皆以篤老之親。因抗節而有所不顧。揆之聖賢之處。此未必其然。斯論世者所當知也。然而大節如諸公。要不可泯沒。公之死。幾百年。同里萬君承勳。感公之節。爲之勒石。而徵文於予。乃爲之銘。其辭曰。

包胥之忠。夸甫之愚。兼斯二者。是以捐軀。古稱觸鬪。多屬空言。踐之自我。死不受憐。至今江門。澄雲如練。時有素車。空中飛電。

明處士四岑張先生墓幢文

同里張生之祐。持其曾叔祖殉難事。乞余表墓。出臬堂先生所作壙志爲據。予少時。聞處士之事而未詳。及之祐之請。遲之又十年。其曷敢辭。處士名樾。字子隆。號四岑。浙之寧波府鄞縣人。甬上之張。爲四姓之一。其最著者。曰文定公之宗。次之曰君子堂。則經略都御史楷之宗。由慈水來者。而處士之宗。名位稍不逮。顧以孝友著里中。稱爲雍睦堂。張氏曾祖某。祖某。父某。處士七歲能作大書。稍長。工爲文詞。爲人恂恂。與物無忤。家貧。同產兄樞。旣析居。處士每互相緩急。或米數升。或薪一捆。蓋浹旬之中。而更僕難計。顧喜飲酒。雖囊中困甚。弗爲止。醉卽陶然而臥。客每過之。欲有所語。見其方醉。則坐待之。久而未醒。或至彌日。其坦率又如此。會國難作。日咄咄。尋有改易章服之令。閉戶坐室中。取牀頭酒獨酌。旣醺。遷牀而走。復索酒飲之。連舉杯百餘。自摩其頂而歎曰。彼曲局者。惡可以兵之乎。乃往竈下。得炭滿甕。和以木屑。置牀下。爇之。投身其上。覆以重衾。時方盛暑。俄頃。酒力墳盈。而絕。家人舁尸而出。則遺骸已紺色矣。嗚呼。改易章服。興朝之制也。違制而自甘於逆天。至殺其身以從之。於義則過。然其志可原矣。就其中或尙有以好名而死者。若處士之死。更無豫乎此也。殆謝翱所謂獨行之士者耶。吾里中以開口死者。趙秀才天生爲最著。然世傳天生之死。本末多舛。予始攷而正之。處士則竟罕有知之者。悲夫。處士生於明萬歷某年某月某日。歿於順治丙戌六月二十日。娶某氏。子某。葬於城南祖關大墓旁。今無後。之祐爲脩其祀。銘曰。

大好糟丘是死所。一醉而死定無苦。下策火攻亦有補。丹心丹顏映千古。花廳沈沈存舊戶。雍睦高門光世譜。雍睦張氏所居。乃元時方平章花廳。至今存其名。

明建寧兵備道僉事鄧倪公墳版文

倪氏自宋已居鄧。顧不甚達。至元末。以貴雄于時。因爲方國珍所連綴。參其軍事。入明三百年。仍未達。及錢忠介公軍起。倪氏子弟從之者。一爲懋熹。字仲晦。卽僉事也。一爲元楷。字端卿。卽後官評事者也。僉事殉於閩中。而評事亦有大節。顧百年以來。文獻以忌諱脫落。卽其後人。亦不甚了了。僉事之曾孫海。以同里董君孫符所作志來。乞予表墓。予安敢辭。方乙酉之夏。浙東內附。定海總兵王之仁者。繳勅印。貝勒令其仍故任。會鄧人擁忠介舉事。降臣謝三賓惡之。貽千金于之仁。令其以兵來殺諸首事者。忠介亦欲貽書之仁。而難其使。公請行。遂以忠介書往。甫至定人。洵洵言昨有陳秀才者。上箋大將軍。詆其降。而大將軍殺之。聞者股栗。俄而三賓之使繼至。公神色不動。有頃。之仁召公曰。君此來。大有膽。公曰。大將軍世受國恩。賢兄常侍。攀髯死國。天下所具瞻。志士皆知其養晦而動也。方今人心思漢。東海鎖鑰。在大將軍。次之則翁洲黃將軍。石浦張將軍。左提右挈。須有盟主。大將軍之任也。之仁遽搖手曰。好爲之。且勿洩。于是令其子鳴謙。飯公於東閣。而別召謝使入見。所以待之略同。亦具報書。但曰。以十五日至鄧共議之。謝使出。乃遣公歸。之仁曰。語錢公。當具犒師之禮。公出喜曰。吾事諧矣。或曰。何以知之。公曰。必諧。翊日。之仁至。果脅三賓出兵餉。萬金與忠介。忠介勞公曰。此李抱眞之招王武俊也。而君以三寸舌戍之。功過之矣。及畫江守定。以公爲職方。參瓜里軍。唐魯爭頒詔之禮。越使陳謙入閩而死。閩使陸清源入浙。亦死。議募一

能者。乃以公往。果稱旨。閩中留之。令以僉事分守建寧。時鄭芝龍盡取閩中兵餉。歸於所屯之東石道。標故有兵千人。至是一空。公捐俸爲餉。以募兵。大兵攻建寧。出鬪。力不支。一軍盡沒。其從者十人。僅脫其一。丙戌八月十一日也。距生於萬歷戊申四月十二日。年三十九。事定。其家以衣冠葬公於某鄉之某原。而評事與公同起江上。事去歸家。不肯薙髮。遂被怨家所告。論死。評事慷慨坐囚中。與華公過宜。李公昭武。高歌木公不屈。魔鬼一曲。聲撼獄壁。時評事尚有母在堂。用奇計遣人以酒入獄。飲評事。至大醉熟睡。因盡薙其髮。醒而覓其髮。已禿矣。痛哭欲自裁。旁人以母命止之。得免。歎曰。吾竟不得與仲晦白首同歸也。蓋後公四十年而卒。其荼苦艱貞。亦足與公配。今評事已無後。予附書之。公志中者。以其布衣報國。生死雖不同。而志則同也。僉事一字煜生。曾祖景晉。連江縣丞。祖正憲。貢生。父忠相。僉事。娶陳氏。繼室以舒氏。子五。孫七。曾孫八。所著有易說。嗚呼。倪氏於明。雖衣冠芳雅。而遜于楊。張屠陸諸家。則已多。乃國亡之後。其見錄于文山幕府列傳者。有二人焉。足以重其族望矣。海之婦。予族姊。先侍御公女孫也。寔甚。予謂之曰。忠節之家。雖貧足樂。幸勿玷此家風也。其勉之矣。

明翰林院簡討兼兵科給事中箕仲錢公些詞

歐陽公作唐宰相。世系表。誠以揆輔之家。與廟社相關係。故特詳之。然而終唐之世。累遭大難。以暨天復。天祐革命之交。宰相子孫殉國者。蓋亦寥寥無多。宋以文信國之忠。不能得之於其弟。有是哉。大節之難強也。明之亡也。崑山顧文康公家有咸正。咸建。咸受。咸正有子天遴。天達。鉛山費文憲公家有曾謀。華亭徐文貞公家有念祖。有孚。遠江陵張文忠公家有允脩。有同。敬太倉王文肅公家有湛。有淳。秀水朱文恪

公家有大定。東阿于文定公家。有元煜。姚江孫文恭公。有嘉績。烏程溫氏。有璜。嘉善錢氏。有穰。有柟。長洲文文肅公家。有震亨。有秉。其餘若高陽之孫。江夏之賀。合門從死者。尙不豫焉。長山劉氏。有孔和。宜城邱氏。有之陶。又其次也。可謂盛矣。吾鄉錢忠介公。受任於國事。既去之後。實志以殉。而諸弟相繼死國者三。夫非踵諸世族之後。爭光接武者與。其安可以無述也。按家傳。簡討諱肅範。字錫九。一字箕仲。浙之寧波府鄞縣人也。寧波府學生。曾大父鳳午。明封禮部主事。大父若賡。知臨江府。父益忠。瑞安訓導。贈副都御史。忠介公第五弟也。受經於忠介公。尤工書。忠介起兵官。其諸弟之從軍者。並授監紀。忠介辭不受。江干失守。皆從忠介浮海而南。時監國從員缺落。誥勅文字。忠介多以屬之簡討。已而忠介請置史官。以紀起居。馬閣學思理。卽薦入館。忠介之卒也。因閣部劉中藻與鄭彩爭。忠介平之而不得。彩反以此爲憾。忠介憂憤疾動。遂絕藥餌而卒。諸子弟成服後。或之瑞安。或往翁洲。卽未去者。亦避地秦川長水之間。忠介命也。而簡討獨與仲兄侍御徘徊未去。或問之。答曰。止者報國。行者全宗。不相背也。中藻方守福安。遣人來迎。時大兵盡定閩地。僅餘福安寧德二城。指日受師。賓朋皆勸簡討。無往而毅然赴之。中藻奏兼兵科。未幾。侍御亦出城募兵。而長圍四合。簡討助城守。凡六月。累與大兵戰。輒勝。而援絕道梗。大兵乃屯于郊。不復附城。而專待其糧盡。侍御遣人縋城入見。簡討復書曰。吾兵猶利。足以一戰。但枵腹枕戈。勢焉能久。城中望援。以刻爲歲。南向望草飛塵起。謂此援兵來也。聞風聲鶴唳。謂此援兵來也。如此又有日矣。而卒寂然。吾惟以一死待之而已。城陷。望百辟山歎曰。此宋少帝入海處也。賦絕命辭。投繯。兵至。被執。不屈。其僕張貴。年僅二十。亦從焉。嗚呼。裹馬革以從兄。可謂各遂其志者矣。福安之陷也。滿城迸散。莫能言簡討之

死。故忠介之葬於黃蘗山。劉大學士沂春。徐都御史孚遠。作碑誄。皆不及簡討事。已而有焦甲者。言簡討死甚悉。蓋曾在圍城中親見者也。於是林太常時對高兵部宇泰。始爲作傳。附之忠介傳後。簡討生於天啓辛酉三月初三日。歿於順治己丑四月十三日。得年二十九歲。妻孺人忻氏。先卒。無子。踰三十七年。有游僧至鄞。冒稱簡討。逕歸錢氏。其親屬叩之。語不能符。詐窮而遁。侍御爲文以辯其事。於是忠介嗣子濬。恭。旣行招魂之禮。合葬簡討於忻孺人之兆。因乞予文以表墓。且曰。誠懼因僞僧之故。致仲父大節有晦。故耳。嗚呼。簡討之正氣。旁魄於雲漢。不待李翰之傳。而後白。許遠之誣也。其聊以備明史世表之參稽。則未必無補耳。其銘曰。

甬江東岸。喬木生春。鄧林之枝。一氣同根。惟忠介有弟。惟明有臣。故國故家。以光清門。何來唐子。謬種妖髡。謂系表可溷。希附哲昆。杞宋文獻。猶幸有存。茫茫閩海。遯矣歸魂。

明故張侍御哀辭

殘明六狂生之一曰張公諱夢錫字雲生。故茂材弟子。乙酉之難。六狂生謀起兵。幾爲降臣謝三賓所殺。幸免。以布衣入幕府。授司務。尋晉侍御。丙戌。走結山寨。又五年庚寅十月。竟死之。六狂生之起也。董華諸公皆司書檄。奔走其間。顧文弱。非能豫兵革也。而侍御于弓矢矛戟。皆習之精。故嘗在戰鬪中。當是時。左右錢忠介公者。莫如張公蒼水。而侍御亞之。軍前呼曰。大張君。小張君。以別之。江上失守。山寨大起。其時先後立營者。曰馮家軍。則簞鎔也。曰王家軍。則篤菴也。曰李家軍。則研齋也。其餘草竊團聚。不可指屈。而蒼水亦軍於平岡。與侍御大蛟之軍相望。諸營呼之曰。大張軍。小張軍。時天下已定。海隅窮山。非果有恢

復之望。特以故君尙在島中。資糧屏屨。聊相應接。雖重爲枌榆之累。而一線之喘。不爲無助。庚寅。大兵洗山入海。蒼水泛海入衛。研齋亦去。馮王二公相繼死散。侍御軍中。不過五百餘人。顧其待士素以恩。誓相依不去。大兵猝至。侍御挾長矛出鬪。夷傷略相等。但衆寡不敵。遂死。五百餘人皆死。無降者。其中突圍而去者三人。翌日有負侍御尸葬之大岐之南麓者。則前突圍而去之三人也。時大兵以團練爲前導。故與山寨卒多有舊。因得其尸而不詰也。於是諸遺民有識此三人者。事定相與求得其墓。而立石以表之。又百年。予過弔其下。因呼山中父老。問以侍御之姓名。而莫之知也。蓋天下之平久矣。乃爲之哀辭。嗚呼。周之頑民。皆商之義士也。而田橫之客。至敢以鬼伯冒漢。易地以觀。其揆一矣。然則如侍御諸公者。其謂之狂生也。亦固其宜。其辭曰。

信公越公。不能扶宋。而況一旅。乃思妄動。肝腦塗地。逆天堪痛。五百人者。其死益奇。空山投骨。重泉相隨。國殤毅魄。至今累啼。死者可生。生者可媿。死殉其軍。生埋其軀。我作誄文。唾壺欲碎。

明管江杜秀才窆石志

秀才姓杜氏。諱懋俊。字英侯。浙之寧波府鄞縣人也。世居縣東之管江。嘉靖中有官山東按察副使名思者。其族祖也。自言出於少陵次子宗武之後。故又稱管江曰花谿。仍世富厚。食指百口。而秀才最以仗義聞於時。鄞江自錢湖而東。負大海。韓嶺鄒谿尖崎諸道。與管江皆相錯。圍以重山。塹以深溝。擅魚鹽竹木之利。民居殷阜。而亦以巖險自爲風氣。宋元時。置巡司於大嵩。以防察之。明初。湯信公視海。以爲未足。乃于大嵩築城。設兵控扼。隸定海衛。置烽堠。貯倉庾。管江一帶。始爲安土。明季流寇鼎沸。中原海隅不逞之

徒亦乘間起。秀才憂之。乃謀於其叔兆菡。請頒土團之法於有司。遂以兵法部勒族人。分隊瞭野。擊柝行夜。閭黨爲之安堵。而沿海諸村。無不仿而行之者。丙戌。浙東不守。諸遺民章皇山澤間。猶思再舉。秀才慨然歎曰。國家養士三百年。而今日反顏易節者。大半進賢冠人物也。草野書生。安得軍師國邑之寄。爲一洒之。于是秀才忽若病癘者。獨坐一樓。援筆不少置。或朗吟。或笑。或痛哭。竟日夕。家人駭甚。從壁罅竊窺之。則案無他物。惟陶菴黃進士臣事君以忠。闡義墨之硃之。纍纍不絕。施公子宗泐者。故都督翰子。其先世亦居管江。時適有五君子之難。公子豫焉。以家財募死士。秀才聞而大喜。乃招姜山之徒助之。幾及三千。公子邀王評事家。勸入管江。刻期舉事。約以馮御史京第軍至城東。則秀才引軍助之。而金峨山中有賣炭趙翁者。或言其精星象。諸兵法。秀才則親往致之。置軍中。奉以爲帥。未抵期三日。評事來奔。以事洩告。城中邏者亦踵至。秀才梟邏者首。據山立寨。鳴鼓起事。而急遣評事先入海。秀才意以城中雖已有備。然計海師早晚必薄城。則勢未能分。故且部署軍士。爲入海計。城中兵果不出。而定海鎮將常得功。豫遣舟師扼海口。分軍直抵管江。評事中途被執。山寨頗阨塞。據險而鬪。三日。矢石雨集。夷傷殆盡。寨陷。秀才猶以家丁力戰。頭目中矢如蝟。重傷。倚牆而斃。尸屹立不仆者數日。公子縱火自焚。兆菡被縛。斫其首。十二刀。而後墜。事定。管江之血如渠。而賣炭趙翁者。或見其煙燄中飛去。時秀才之父尙在堂。有司籍之。山中人憐其義。匿其親屬。不以聞。未幾。其父卒。其妻亦卒。其二子憲琦。憲堇。育於陸高士字燬家。撫之如己子。董高士曉山。教之讀書。范孝子洪震。爲之治葬。置墓田以贍其祀。憲琦甚有志行。自以父死國難。稿素不近酒肉。有妻不娶。宇燬等以大誼責之。始婚。未幾病卒。憲堇已早夭。秀才遂無後。兆菡字承芝。宗泐字

仲茂時稱爲管江三烈士。而趙翁辛卯壬辰間。猶以其術往來海上。後亦死。嗚呼。予嘗過杜氏之居。流覽當年戰場。其間居民果伉勇。一呼雲集。自視無前。然此特山澤間習氣。亦不特湖東也。秀才讀書多矣。徒以廟社之感。頓忘其力之不足。而仗此輩以揮魯陽之戈。不亦愚乎。抑亦聊以一擲也。杜氏之宗。在管江者。至今猶盛。然皆莫知表章秀才者。而陸高士子曰經旦。頻請予志其遺兆。予故不辭而銘之。其辭曰。由管江而東爲童谷。是爲吾先人再世避地之區。其于秀才之事。蓋所目擊而唏噓。嗚呼。崩雲裂瀑。如聞英爽之踟躕。平陵黃犢。剩茲殘墟。

雪竇山人墳版文

雪竇山人魏耕者。原名璧。字楚白。甲申後改名。又別名甦。慈谿人也。世胄。顧少失業。學爲衣工于茗上。然能讀書。有富家奇其才。客之。尋以贅壻居焉。因成諸生。國亡棄去。先生所交皆當世賢豪義俠。志圖大事。與於茗上起兵之役。事敗。亡命走江湖。妻子滿獄。弗恤也。久之。事解。乃與歸安錢纘曾居茗谿。閉戶爲詩。酷嗜李供奉。長洲陳三島。尤心契之。東歸。遊會稽。有張近道者。好黃老。管商之術。以王霸自命。見詩人。則唾之曰。雕蟲之徒也。而其里人朱士稚。與先生論詩。極傾倒。近道見之。亦輒痛罵不置。然三人者。交相得。因此并交纘曾。三島。稱莫逆。先生又因此與祈忠敏公子。理孫班孫兄弟。善。得盡讀淡生堂藏書。詩日益工。然先生於酒色有沉癖。一日之間。非酒不甘。非妓不寢。禮法之士深惡之。惟祁氏兄弟。竭力資給之。每先生至。輒爲置酒呼妓。而朱張數子左右之。久之。先生又遣死士致書延平。謂海道甚易。南風三日可直抵京口。己亥。延平如其言。幾下金陵。已而退軍。先生復遮道留張尙書。請入焦湖。以圖再舉。不克。是役也。

江南半壁震動。旣而聞其謀出於先生。於是邏者益急。纘曾以兼金賄吏。得稍解。癸卯。有孔孟文者。從延平軍來。有所求於纘曾。不壓。并怨先生。以其蠟書首之。先生方館於祁氏。邏者猝至。被執。至錢塘。與纘曾俱不屈以死。妻子盡沒。班孫亦以是遣戍。初。諸子之破產結客也。士稚首以是傾家。近道救之。得出獄。而近道竟以此渡江。遇盜而死。己亥之役。三島亦以憂憤而死。眞所謂白首同歸者矣。嗚呼。諸子並負不世之志。而遭逢喪亂。相繼以不良死。則百六之厄也。先生旣死。山陰李達、楊遷經營其喪甚力。亦以是遣戍。而錢塘孫治卒。購得先生骨。葬之南屏。其後改葬於靈隱石人峯下。改題曰長白山人之墓。鄞人墓在湖上者。楊職方文琮同以是年死。而次年張尙書蒼水亦葬焉。時呼曰三忠之墓。先生之居於苕上。爲晉時二沈高士故山。故有息賢堂。因名其集曰息賢堂集。自言其前身乃劉公幹也。粵人口口口。不可一世。獨心折先生之詩。嘗曰。平生梁雪竇。是我最知音。一自斯人死。三年不鼓琴。是矣。口口蓋嘗再從先生寓鄞。其風格頗相近云。楊職方之墓在孤山。

鮚埼亭集卷第九

碑銘

鄧 全祖望紹衣撰

餘姚史夢蛟竹房校

明故權兵部尙書兼翰林院侍講學士鄧張公神道碑銘

世祖章皇帝之下江南也。浙東拒命。雖一歲遽定。而山海之間。告警者尙累年。吾寧之首事者。爲錢沈二公。其間相繼殉節者四十餘人。而最後死者。爲尙書張公。方錢忠介公之集師也。移檄會諸鄉老。俱未到。獨公先至。忠介相見。且喜且泣。旣舉事。卽遣公迎監國魯王於天台。王授公爲行人。至會稽。賜進士。加翰林院編修。兼官如故。入典制誥。出籌軍旅。公雖與忠介共事。而持議頗不盡同。閩中頒詔之使至。議開讀禮。張公國維與熊公汝霖爲一議。朱公大典與忠介爲一議。公出揭。以爲當如張公之言。因請自充報使。入閩。以釋二國之嫌。王從之。及自閩還。累有建白。不見用。江干之破也。公泛海入翁洲。道逢富平將軍張名振。扈王入閩。公從之。旣至。招討使鄭成功以前頒詔之隙。修寓公之敬於王。而不爲用。公勸名振還石浦。招散亡。以謀再舉。乃偕還。王加公右僉都御史。時威鹵侯黃斌卿守翁洲。名振以石浦之軍。與爲犄角。明年。松江提督吳勝兆。請以所部來歸。斌卿心不欲往。而故都御史沈公廷揚。御史馮公京第。與公並勸名振應之。遂監其軍以行。至崇明。大風覆舟。沈公死之。公與名振等皆被執。有百夫長者識公。導之使走。乃得至公之故壬午房。考知諸暨縣錢氏。七日。間道復歸翁洲。時忠介已奉王出師於閩。浙東之山寨亦